

Mot del president

Aqueste mes d'octobre se duèrp e se clava per dos eveniments màgers per l'occitan. Fòrça diferents, cadun encarna pasmens un aspecte de çò qu'es l'accion occitana e lo trabalh per la reconeissença de la nòstra lenga.

Lo 3 d'octobre, l'Acadèmia aranesa dera lengua occitana inaugura una sedença a Barcelona dins los majestuosos locals de l'Institut d'Estudis Catalans. Coma membre de las doas acadèmias mas tanben coma president de l'IEO, i donarai una petita conferéncia que presentarà lo projècte e lo trabalh de l'IEO e afortirà los ligams e las collaboracions amb la val d'Aran e amb Catalonha.

Los 25 e 26 d'octobre, a Vilafranca de Roergue, se debanarà una manifestacion batejada "Carrièras occitanas". Del costat de l'IEO, podèm pas que nos regaudir de veire una crida espelir en favor de la nòstra lenga e li podèm pas que desirar lo succès que s'amerita e una participacion a la nautor de l'enjòc. Es important que pòsca capitair ben.

Cal ajustar que, mentretant, a Baiona, l'IEO serà tanben present lo 25 d'octobre per l'amassada generala del collectiu "Pour que vivent nos langues" que se deuriá, a l'escasença, transformar en associacion amb los meteisses objectius de pesar dins lo debat public per la proteccion e la promocion de las lengas minorizadas de l'estat francés.

Institucionalament a Barcelona, per carrièras a Vilafranca de Roergue, amb las autras lengas a Baiona, l'objectiu es sempre lo meteís: donar tota sa visibilitat

a nòstras lenga e cultura. Dins una amira vesina, avancem que se debanarà, lo 15 de novembre a Niça, lo Fòrum d'Òc 2025 sus lo tèma del ròtle de las regions dins l'aparament de la lenga. L'IEO Federal es convidat a i participar çò que considèri coma una reconeissença e un onor.

Per çò qu'es de l'IEO, sabètz que lancèrem en agost passat una consulta de totas las seccions regionalas, departamentalas e localas del malhum. La consulta se clavarà lo 12 d'octobre: demòra, ara per ara, pauc de temps per i respondre e esperam reculhir çò mai de responsas possible que seriá la pròva de l'interès e del sosten portats a la nòstra accion e nos serviríá per conéisser mai finament las iniciativas de terren. A l'ora que publicam aquestes *Ressons* mancan encara pro de responsas: comptam sus las seccions per oblidar pas de respondre.

En parlant de las seccions, importanta es la conferéncia que se debanèt lo 15 de setembre passat e que ne trobaretz un compte rendu sintetic de la man del secretari federal. Bèl primièr, vòli mercejar los promotors e organizators d'aquesta conferéncia d'auton que permetèron que se parlès d'un tèma mai que fonamental: la plaça dels joves dins las activitats de l'IEO. L'enjòc es enòrme que, sense aquò, quina transmission podèm esperar per la nòstra lenga e, doncas, quina subrevida? Seria de desirar, segon ieu, que los escambis realizats e las experiéncias presentadas se poguèsson expandir dins mai d'una seccion per elaborar un vertadièr programa estructurat en relacion amb la

RESSONS DE L'IEO E D'ENDACÒM MAI

n° 2 - OCTOBRE DE 2025

joventut. Segurament que se poiriá parlar de "las joventuts" ja que, al mieu vejaire, son causas diferentas se parlam de joves de 10-15 ans e joves de 15-20/25 ans. Es una question que, me pensi, nos caldrà abordar prioritàriament e qu'es pas brica desligada del programa que ne parlarai mai tard a l'entorn de la transmission e socializacion.

Tanben, voldriái insistir per que las seccions poguèsson participar fòrça mai nombrosas als escambis de la conferéncia mas tanben per que poguèsson metre en òbra d'accions transversalas entre elas es a dire "inter-seccions". Aquela "inter-seccionalitat", valent a dire far de l'IEO una "inter-seccion", me sembla un ais de seguir que poiriá permetre de donar mai de sens a çò que poiriá aparéisser, vist de luènh o a primièra vista, coma una escampilhament de las iniciativas, e, ansin, afortir una panoccitanitat necessària, LA necessària panoccitanitat que volèm promòure.

Demest lo trabalh en cors, senhali que son a mand de sortir, per la fin de l'annada, dos libres de la colleccion "Flor envèrsa", çò son doas traduccions en occitan, una de l'italian de la Renaissance, l'autra de l'anglés victorian. Una soscripcion serà aviada dins los primièrs jorns d'octobre que ne seretz assabentats.

Tenguèrem un conselh d'administracion lo 20 de setembre passat, lo primièr dempuèi l'eleccion del novèl burèu lo 27 de mai passat. Remembri que, estatutàriament, cal que lo conselh d'administracion se recampe dos còps per an mas que mon engatjament èra de l'acampar un pauc mai. Entre lo 27 de mai e lo 20 de setembre, nos acampèrem onze còps amb

los membres del burèu, rescontrèrem diferents partenaris e trabalhèrem a un plan d'accions que lo conselh d'administracion validèt e que, ara, nos cal metre en plaça. L'òbra es granda e, se planhèm pas lo nòstre temps, la nòstra energia e lo nòstre engatjament de cada jorn, podèm pas far de miracles amb las ressorsas qu'avèm o, puslèu, las ressorsas que nos fan fraita.

Dit tot aquò, es pas lo lòc, aici, d'o desvolopar tot que nos mancariá la plaça. Los aderents recebràn los comptes renduts dels conselhs d'administracion passats çò que permetrà a cadun de s'assabentar e se far una idèa sus lo trabalh en cors. Mas, pòdi anonciar, entre autras causas, la decision d'empèlhar un coordinator per lo trabalh del burèu federal per unas 10 oras per setmana, la mesa al punt d'un dispositiu per l'activitat d'edicions, o encara la plaça que volèm donar a l'oralitat e la transmission d'una lenga qualitatosa. Aquò rejunh en partida çò que disiái, adès, de l'accion cap a la joventut que nos i cal donar los mejans de la reconquista lingüistica. Tanben, coma o poiretz legir dins las paginas seguentas, volèm promòure los rescontres e escambis entre creators. Tantas accions que i voldriam implicar las sòcias e los sòcis.

Aquestes *Ressons* son dubèrts a totes, seccions e aderents. Es atal que trobaretz la reaccion d'una sòcia que nos arribèt après paréisser lo primièr numèro. Es important, per nosautres, aquela mena de retorns. En mai, pensam que, dins l'idèa qu'ai exprimida d'inter-seccions, seriá interessant que, dins los numèros que venon, presentèssim las seccions - e lors

RESSONS DE L'IEO E D'ENDACÒM MAI

n° 2 - OCTOBRE DE 2025

iniciativas -, quora l'una, quora l'autra. Ne tornarem a parlar lèu, espèri.

En tot cas, sapiatz que nos i volèm téner. Lo trabalh manca pas, comptam sus totes vosautres per perseguir, amb nosautres, l'òbra comuna, e i participar. E subretot, subretot, desbrembez pas que, coma disiá un jorn la cantaira aranesa

Lúcia Mas, "es lengües morissen quan les deisham de costat". La nòstra, nos la cal pas daissar de costat, es la nòstra suprèma e exigenta responsabilitat: abandonarem ni la nòstra responsabilitat, ni la nòstra exigéncia.

Patrici Pojada

* * *

De destacar

Projèctes participatius...



2026 - Projèctes culturals

- Arts Plasticas
- Musica
- Vidèo
- Poesia
- Arts de la scèna...

Festivals e eveniments

IEO Creacion

Contacte : secretariat@ieo-oc.org
Daidièr Mir 06 87 56 05 34 - **Roman Brunel** 06 69 22 33 59

Collègas, amigas e amics,

Dins l'amira d'adobar nòstres accions per 2026, a l'acamp dau burèu dau 20/07/2025 avèm decidit de metre en plaça una aisina culturala virada cap ais artistas e estructuras que prepausan de contenguts ligats a la lenga cultura occitana.

L'idèa es simpla :

1 - Cadun d'entre nautre, a l'escasença de sei rescòntres d'artistas de quin domeni que siegue,

d'actors culturaus (responsablès d'estructura o d'eveniment...) de li prepausar d'intrar en contacte ambe nautre, de ben voler respondre a nòstre pichon questionari per saber sei projèctes e/o sei besonhs, de sei condicions d'intervencion.

2 - Nautre a l'IEO creacion (qu'es sonque lo nom dau projècte), nos encargam de faire la sintèsi dei respònsas sota forma de doas colonas : ofèrta / demanda o projècte e de començar de far grellhar d'idèas de ligams entre lei actors, de ligams entre artistas, entre estructuras e entre artistas e estructuras.

3 - Farem validar lei respònsas per aquelei que s'engatjan dins lo projècte, e lei metrem en relacion leis uns leis autre, ambe ges d'autra intencion que de servir d'intermediari.

4 - Après aqueste segond retorn, poirem establir una mena d'agenda dei projèctes en cors, en esperant aver favorizadas leis idèas e leis iniciatives, d'aver creat de relacions novèlas e un programa mai consequent qu'au ponch 2. La data de 2026 es donada coma la pus pròcha possible, mai empacha pas de projèctes sus una temporalitat mai longa.

RESSONS DE L'IEO E D'ENDACÒM MAI

n° 2 - OCTOBRE DE 2025

Per lo monde que serián interessats, sufís de contactar lo secretariat del'IEO federal : secretariat@ieo-oc.org

Vos gramercejam per faire còrrer l'idèa, pensam que per aquela inciativa, l'IEO pòt mostrar son ròtle d'ajudaire au monde culturau e sa volontat de favorizar l'accion panoccitana.

Daidièr Mir, Roman Brunel.

* * *

Vida del malhum

Festival Occitania...

Coma cada an, la davalada torna e amb ela... lo **Festival Occitania** ! Per aquela edicion, vos balham rendètz-vos per 24 eveniments per descobrir las creacions occitanas actualas, e vos podèm ja assegurar que cadun·a i trobarà son compte ! Al programa : musica, dança, literatura, cinèma, teatre, visites. Entre Tolosa, Murèth, Blanhac, Rius de Bolbèstre, Cunhaus, Pinsaguèl o encara Caramanh, la còla de l'IEO 31 e sos partenaris vos espèran per festejar la lenga e la cultura occitanas !

Tot lo programa :

<https://ieo31.com/wordpress/festival-occitania/festival-occitania-2025/>

Contacte: contacte@ieo31.com



* * *

Conferéncia de las seccions departamentalas de l'IEO...

La Conferéncia de las Seccions Departamentalas (CSD) foguèt creada en 2023 après l'AG de Rodés. Lo 15 de setembre, la CSD, organizada per Laurenç Boitiàs e Estela Mazodier, reüniguèt los responsables de sèt departaments, dos èran excusats. La

RESSONS DE L'IEO E D'ENDACÒM MAI

n° 2 - OCTOBRE DE 2025

tematica de l'acamp en visioconferéncia èra la joinessa e los biaisses de renosar los ligams ambe la nòstra lenga-cultura.

D'escambis rics en iniciativas e idèas an permès d'obrir de perspectives pels actors del terren cultural e educatiu que son los militants e las militantas de l'IEO. Estela Mazodier de l'IEO Gard nos contèt son experiéncia dins l'organizacion de talhièrs de teatre en lenga e se prepausa de compartir son saber-far ambe las seccions que serián interessadas. Daidièr Mir prepausèt de sessions cortetas de formacion de formators per metre en plaça de talhièrs de gravadura sus carton, una activitat en occitan que se pòt prepausar a totas las generacions (mainatges e adultes) sens que siá besonh d'aver de competéncias artisticas. Las seccions que se voldrián formar pòdon contactar lo secretariat federal : secretariat@ieo-oc.org

Un torn de taula permetèt de far lo balanç de las diferentas accions menadas coma las intervencions regularas de l'IEO Cantal dins las activitats peri-escolaras (TAP), los projèctes d'implantacion d'un site bilingüe dins las Lanàs. L'IEO ARA es a constituir un catalòg de la creacion artistica dins sa region. La seccion de Girona portèt pèira al festenal Mascaret ambe la projeccion de filmes d'animacion en lenga. La manca de mejans umans e financièrs demòra çà que la una empacha de las grandas per menar los projèctes.

Un acamp es estat marcat dins los calendiers pel 19 de genièr de 2026 sus la tematica « *Cossí afortir los ligams ambe los artistas ?* ». Los organizators e l'IEO federal vos convidan a participar.

La còla del burèu federal farà tot son possible per ajudar a las iniciativas locals.

Daidièr Mir, secretari.

* * *

Panoccitanitat...

Dubertura d'ua naua delegacion der Institut d'Estudis Aranesi-Acadèmia Aranesa dera Lengua Occitana, en Barcelona - 3 d'octobre de 2025

Era dubertura d'ua delegacion der Institut d'Estudis Aranesi-Acadèmia Aranesa dera Lengua Occitana, en Barcelona, ei ua hita istorica entara lengua e cultura occitanes. Se tracte d'ua actuacion d'un gran impacte que



RESSONS DE L'IEO E D'ENDACÒM MAI

n° 2 - OCTOBRE DE 2025

vò enfortir era preséncia dera lengua occitana en Catalonha e facilitar era ampliacion dera activitat dera Acadèmia mès enlà deth territòri aranés.



Era naua sedença serà plaçada en Carrèr Maria Aurèlia Capmany, 14-16, en barri de Ciutat Vella de Barcelona. Enquia ara, era activitat dera Acadèmia se concentraue ena Val d'Aran, e ara, era preséncia ena capitau catalana permeterà hèr un salt qualitatiu ena sua foncion de recèrca e normativizacion, plaçant-la en un encastre mès ampli mès enlà deth territòri aranés.

Er objectiu ei qu'er occitan d'Aran non se percebe sonque coma ua realitat ligada ara Val d'Aran, senon coma ua lengua que hè part dera identitat collectiva catalana e deth patrimonni europèu. Aguest nau espaci facilitarà era coordinacion dirècta damb es institucions nacionaus, especialment er Institut d'Estudis Catalans e er Institut d'Estudis Occitans e daurirà era pòrta a establir ligams mès solids damb eth sector universitari e es agents culturaus dera ciutat. Coma lengua pròpria d'Aran, oficiau en Catalonha e cooficiau en Estat espanhòl, er aranés merite un reconeishement e ua preséncia publica qu'aguesta naua sedença contribuirà a hèr possibles.

Programa deth diuendres 3 d'octobre de 2025

18.30 h - Sala Prat de la Riba (Institut d'Estudis Catalans, carrer del Carme, 47 - Barcelona)

Er acte includirà parlaments institucionaus damb era participacion de Teresa Cabré, presidenta der IEC, e de Jèp de Montoya, president der IEA-AALO. Tanben i intervieràn es academics Patrici Pojada, president de l'IEO federal, damb era conferéncia "*Collaborar al servici de la lenga occitana: un projècte per un futur compartit*", e Ramon Sistac damb era conferéncia "*Lengües bessoes per genetica o per aleitament?*".

Er acte compdarà damb era intervencion musicau d'Eric Fraj, vicepresident der IEO federau e s'acabarà damb un aperitiu inaugurau.

I ètz toti convidadi! Confirmar era assisténcia a secretaria@institutestudisaranesi.cat

Mès informacions: <https://www.institutestudisaranesi.cat/er-institut-destudis-aranesi-dauris-delegacion-en-barcelona/>

RESSONS DE L'IEO E D'ENDACÒM MAI

n° 2 - OCTOBRE DE 2025

ORS, Valadas Occitanas

A l'escasença de la Jornada dedicada ai lengas minoritàrias (francés, occitan, francoprovençau), l'IEO es estada convidada a Ors per participar au programa de la jornada. I seràn presentadas de traduccions d'obratges, dins un projècte ont se mesclan lei lengas per lo biais d'una prestacion orala de lectures pluralas. Es lo format dei lectures literaràrias « L'INTRECCIO - LA TREÇA, L'ANTERSAN, LA TRESSE. Seràn presentats tanben de juècs pedagogics e musicaus.

Serà lo dissabte 4 d'octòbre a l'auditòri dau licèu deis Ambrois a Ors.

Entresenhas : Chambrà d'Oc - Agnès DIJAUX - tel. : 0033 3284730692 - agnesdijaux@gmail.com



* * *



© Fòto D. Mir

SETEMBRE A L'ESPACI OCCITAN DE LAS VALADAS

7

Ressons de l'IEO e d'endacòm mai es publicat sota la responsabilitat del burèu federal de l'IEO

Contacte: secretariat@ieo-oc.org

INSTITUT D'ESTUDIS OCCITANS

11 carrièra Malcosinat/rue Malcousinat - 31000 TOLOSA/TOULOUSE

www.ieo-oc.org

RESSONS DE L'IEO E D'ENDACÒM MAI

n° 2 - OCTOBRE DE 2025

Per l'estiu del 2025, l'associacion Espaci Occitan de Draonier, en las valadas occitanas d'Italia, a prepausat als aimants de la lenga d'òc cinc rescontres de lectures, interpretacions e comentaris de tèxtes occitans d'autors de las valadas. Poètas contemporanèus, vius, desapareguts recentament, o dels quals de recuèlhs novèls venon d'èsser publicats, descobèrts o revelats a través de lors composicions mai intimas, celèbras o originalas.

Al mes de julhet protagonistas son estats de Tiziana Raina d'Elva, Val Maira, mòrta prematurament en 2024, que pòt èsser considerada coma l'Emily Dickinson de las Valadas per son cant de la pichonas causas e de la natura. Albino Barrel de Sabournoui de Vinai, mòrt en 2019, foguèt una de la voses poeticament mai autoras e sensiblas de la Val Estura. En agost es estat presentat lo poèta Edver Vercelletti de Vaudier, celèbre dins lo domeni piemontés mas pauc conegut dins las Valadas, quitament dins sa Val Gés.

Lo 4 de setembre, a un an de sa desaparicion, omenatge foguèt rendut a *Tounin Bessoun*. Amb sa filha, Elena Mireio Richard, se tracèt la figura de Giovanni Antonio Richard de Blins, militant occitanista, cronicair, poèta e contaire en lenga d'òc. Lo 18 de setembre foguèt presentat *Poesia de noste, Antologia de la poesia feminina en lenga d'òc - tòrm 2*. Après lo succès del tòrm 1, la poetessa gascona Paulina Kamakine, amb la collaboracion de Rosella Pellerino de l'Espaci Occitan per la seccion de las Valadas, prepausa una novèla colleccion de poetessas occitanas contemporanèas. Dins aqueste volum, espaci es donat a Clelia Baccon-Bouvet, Maura Bertin, Ines Cavalcanti, Michela Giordano, Augusta Gleise, Cristina Levet, Paola Luciano, Graziella Tron, Graziella Vachet, Lucia Vinai. Mantunas autritz èran presentas per legir e comentar lors composicions.

L'iniciativa fa partida del projècte de l'Union Montana Val Maira, coordinat per la Region Piemont e finançat per la Presidència del Conselh dels Ministres, dins l'encastre del programa d'intervencions previstas per la lei 482/99 per la proteccion de las minoritats lingüisticas e istoricas.

Informacions : Espaci Occitan - Via Val Maira 19 - Dronero (Cn) - Italia
tel.: 0171.904075 - segreteria@espaci-occitan.org - www.espaci-occitan.org

* * *

Formacion professionala...

Un programa plan diversificat de formacions a l'entorn de la lenga e de la cultura occitana

Lo Centre de formacion professionala occitan de la Region Auvèrnhe Ròse Alps, lo **CFPO Montanhòl**, ven de publicar son programa de formacions professionalas pel periòd de setembre de 2025 a julhet de 2026.

S'i trobarà d'estagis « Parlar » d'una jornada a l'entorn de l'aprendissatge de la lenga en Ardecha o a Orlhac, una formacion enquadrada per de professionals pels actors publics o privats del torisme per los ajudar a caracterizar l'ofèrta toristica de lor territòri en valorizant lo patrimòni occitan, un cursus de descobèrta de l'istòria, de la literatura, del movement de las idèas en país occitan animat pel coneissee grand de la cultura occitana qu'es l'escrivan Alem Surre Garcia, un estagi de doblatge de films en occitan prepausat pel comedian professional Laurent Labadie, obèrt quitament als que parlan pas encara lenga, un estagi a l'entorn de la pedagogia de las escòlas Calandreta, una formacion destinada als ensenhaires de musica tradicionala e artistas musicians per melhor s'apropriar la lenga occitana, una formacion destinada als responsables emplegats associatius per los ajudar a motivar de politicas publicas al benefici de l'occitan, en collaboracion amb l'Ofici public de la lenga occitana (OPLO). Aquela formacion es estada prepausada los 26/08 e 23/09 a distància, e serà prepausada tornarmai los 20 e 21/10 de 2026 en presencial a Orlhac.

Aqueste programa plan complet trobarà son moment fòrt amb los Rencontres occitans en Auvèrnhe a la fin de julhet de 2026 a Sant Bonet pròchi Riòm (63).

Aquelas formacions se faràn en divèrses ponches de la Region Auvèrnhe-Ròse Alps e a l'Ostal del Telh a Orlhac, sèti del CFPO Montanhòl, mas tanben a distància.

Entresenhas : contact@cfpo-montanhoul.org - 06 50 94 86 03

* * *

Paraula de sòcia...

Marselha, 31 d'avost de 2025

Veni de legir lei *Ressons de l'IEO e d'Endacòm mai* n°1 e me regaudissi d'aquela volontat de comunicar regularament, çò que nos a fòrça mancat. Coma aderenta de l'IEO dempuei 45 ans, e dins l'ambient de reviscolament de nòstra associacion, me permeti

RESSONS DE L'IEO E D'ENDACÒM MAI

n° 2 - OCTOBRE DE 2025

d'apondre quauquei questions e suggestions.

- La garrolha a prepaus de la mesa en plaça d'una plataforma informatica me sembla pas aver d'interès.

En còntre podriá permetre a cada aderent·a de reçaupre una carta de sòci·a (ça qu'avèm pus despuei d'annadas), de durbir un espaci de comunicacion dei sòcis entr'elei e ambé leis elegits, de compartir tot çò pòt metre en valor la lenga-cultura dins l'espaci public (GPS, cartografia e sinhaletica per exemple).

- A prepaus dau foncionament intèrne, l'equipa novela prevei un rotlament dins lei responsabilitats ? Una reflexion seriá de menar sus lo fach de comolar pas lei mandats electius e de consultar regularament leis aderents sus lo foncionament e leis orientacions de la federacion, notadament entre lei regions (CREO, AELOC...) e l'IDECO e la politica editoriala.

- La cotizacion pausa dos problèmas :

1 - Pren pas en còmpte la situacion financièra deis aderents (porriá èstre proporcionala ai revenguts). L'argument ausit de la dedurre deis impòstes ten pas la critica, puei que faudriá qu'aguessiam un jutificatiu, e pertòca pas lei personas que son pas impausablas.

2 - Es inequitable per lei personas solas (mai sovent de fremas), 30 € per una persona, 40 € per un pareu.

- Espèri tanben poder trobar dins aquesta letra d'informacions sus leis autrei lengas minorizadas de França dins l'espèr de sortir de l'entre-se. E pereu, pensar de biais d'organizar de rescòntres convivias entre sòcis, per escambiar, faire viure la lenga e leis experiéncias, de s'aculhir leis uns leis autrei. Una idèa que porriam apelar "*La Rota Occitanista*", un camin qu'anariá dins lo sens de la solidaritat e de la dubertura, coma una alternativa a la mercandizacion dau monde.

Cristina Findal

Per tota respònsa : secretariat@ieo-oc.org

* * *



© Fòto D. Mir

Preséncia de la lenga...

Carrièras Occitanas a Vilafranca de Roergue los 25 e 26 d'octobre de 2025



Dempuèi 2015, e la darrièra manifestacion Anem Òc, avèm pas agut l'escasença de mostrar per carrièra la volontat populara d'accès a la lenga occitana. Pr'aquò, l'enveja e la necessitat i son encara.

Dels Alps italians fins a la Mar Granda, recampem-nos. Balhem de vam, a un moviment que sosten l'idèa qu'avèm besonh de diversitat culturala coma de diversitat ecologica o umana. Defendèm una lenga per totes, que nos permet de créisser amassa dins una societat dubèrta, conscienta de son environament coma de son istòria. Mai un pòble pòrta collectivament sa cultura, mai es capable de s'organizar, de crear, d'aculhir e de partèjar.

Mainatges, avèm totes cantat sa cançon, los 25 e 26 d'octobre li tornarem son ostal. Coma per materializar lo nòstre patrimòni immaterial, tornarem bastir l'ostal del Joan Petit, a l'endrech ont foguèt rasat al sègle XVII, per castigament de la revòlta dels crocants.

Manifestacion, discutidas, cantadas, concèrts, vilatjòts dels diferents païses occitans, passacarrièra...

Los 25 e 26 d'octobre de 2025, cridam a una dimenjada festiva de manifestacion e d'accion per la lenga occitana !

Lo programa es a s'aprestar e serà lèu publicat.

Per se téner informats : <https://www.carrieras-occitanas.eu/>

Per ajudar financièrament l'iniciativa :

<https://www.helloasso.com/beta/associations/detz/formulaires/1>

* * *

RESSONS DE L'IEO E D'ENDACÒM MAI

n° 2 - OCTOBRE DE 2025

Un film documentari de mancar pas

Une langue en plus, un filme escrich per Michel Feltin-Palas e realizat per Cyrille Claus, de veire sus France 3 fins al 24/10. Es un film documentari que prepausa un torn d'horizont cultural, pedagogic, istoric e politic sus las lengas de França. Un moment de dubertura dels esperits de bon veire e d'ausir dins aquesta passa. Eric Fraj, nòstre vicepresident encargat transmission e de la socializacion de la lenga participèt al projècte iniciat per Francis Cabrel e Anne Etchegoyen. 50 minutas per se sentir mens sols, clicatz aquí :

<https://www.france.tv/france-3/corse-viastella/collection-documentaire-viastella/7543592-une-langue-en-plus.html#about-section>

* * *

Que voletz aprènguer a parlar eth occitan deth Comenge ?

Anatz ara MJC de Sent Gaudenç : qu'í trobaratz un talhèr, moment conviviau que mescla charradissa, jòcs e exercicis, visitas e intervencions entà descobrir o practicar eth occitan d'un biais ludic e actiu. Eth talhèr qu'ei animat per Matieu Faure.

Prètz : 130€/an (puish tarifa descreishenta)

Organizacion : M.J.C. du Saint-Gaudinois en partenariat dab Eth Ostau Comengés.

Contacte : 05 61 94 66 45 / info@mjc-st-gaudens.org / www.mjc-st-gaudens.com
/ mathieu.faure@ostaucomenges.org

* * *

S'aprèstan...

Las 45^{as} Rapatonadas, festival del conte d'Orlhac, de l'IEO de Cantal

En novembre de 2025.

Contacte e entresenhas: <https://www.ieo-cantal.com/> - 06 22 60 86 30 - contact@ieo-cantal.com

* * *

RESSONS DE L'IEO E D'ENDACÒM MAI

n° 2 - OCTOBRE DE 2025

FORUM D'OC, Niça, 15 de novembre de 2025



Niça, vila aderenta al *Forum d'Oc*, aculhirà l'eveniment a comptar de 9 h 30 a l'Ostal de la Comuna.

Lo *Forum d'Oc* se creèt après la tenguda d'un collòqui a Marselha lo 30 de novembre de 2013. Se dona per tòca de recampar dins la region Provença-Alps-Còsta d'Azur totas las energias que trabalhan per la lenga d'òc. Ne son los sòcis fondadors la Mantenença de Provença del Felibrige, la seccion regionala de l'IEO, l'Associacion per l'Ensenhament de la Lenga d'òc, l'Associacion dels Professors de Lenga e Cultura regionalas de

l'Acadèmia de Niça e la Federacion provençala de Calandreta.


En 2025, lo *Forum d'òc* s'acampa a Niça a l'entorn de la question "Se pòdon las regions salvar las lengas de França?".

Lo programa prepausa de metre a la lutz los exemples de Catalonha e de Piemont mas tanben de debatre a l'entorn de la question de las politicas regionalas amb de representants del Felibrige e de l'IEO, de l'Ofici Public de la Lenga Occitana e d'elegits.

Mai d'entresenhas: <https://forumdoc.org/fr/rencontres-2025-du-forum-doc/>

Contacte: contactforumdoc@gmail.com

* * *



© Fòto D. Mir